



Inuiaqatigiit kissaataat tunngavigalugit nunap ilaani aatsitassarsiorfissanik inerisaaviussanik pilersitsinissaq aammalu nunap ilaani allani avatangiisit, ilorrisimaarneq, inuussutissarsiutit pioreersut assigisaalluunniit tunngavigalugit aatsitassarsiorfigineqarusunngitsunik pilersitsinissaq pillugu oqallisissiamik saq-qummiusseqqullugit Naalakkersuisut peqquneqarnissaanik Inatsisartut aalajangiiffisassaattut siunnersuut. Oqallisissiaq innuttaasunik, soqutigisaqaqati-giinnik aalajangiisartunillu peqataatitsinikkut amerlasuunit akuuffigineqartumik oqallinnissamut toqqammaviussaaq. Oqallisissiaq 2016-imi upernaakkut ataatsimiinnissaq nallertinnagu naammassineqareersimassaaq.

(Inuit Ataqatigiit Inatsisartunut ilaasortaataat)

Siullermeerneqarnera

Siunnersuut taperserlugu imatut Partii Naleqqamiit oqaaseqarfigissavarput.

Nunarput isorartoorujussuuvoq aammalu immikkut tunumi nunamik – nunarsuarmigooq nuna eqqissisimatitat annersaat - annertuupilussuarmik eqqissisimatitamik nunataqarluta. Taassumallu saniatigut nunatta sermersua nunatta annerpaartaa poornikuullugu imaasiallaannaq suli aatsitassanik piiiaffigineqarsinnaanngitsumik. Taamaattorli sineriassuarput isorartooq kalaaliusugut, tamatta soraajuittumik perput sorpassuarnut iluaqutigaarput, kinguaatsinnullu aamma taamatut iluaqutaasussatut tunniuttussaagatsigu puujussanngilarput.

Avannaarpiarsuaniit kujammut nuna asiilasooq kangerluppasualik uagutsinnut kalaallinut nunassaqqissoq pisuussutinik uumasunik uumaatsunillu qalaarpoq, taamaattorli aamma nunarsuup avannaarpiarsuaniikkatta pinngortitarsuarput innarlaraanni siviisuupilussuarmik pissusissani ateqqinniartarmagu eqqarsarluaqqissaartariaqarnermik pissutissaqarluartippaatigut, taamaattumik siunnersuutip tunngavia tapersersussallugu isumatusaarneruvoq, aamma immitsinnut pilersornerulernissatsinnik siunertaqartilluta.

Assersuutigalugu kujataa, nuna nuannersorsuaq, kujataamiut namminneq taasarpaat “nunatta pequusivia”. Tassami taqqanna nunatta sinneranut sanilliullugu kiannerunermigut nunalerinermut uumasuuteqarnermullu naleqqutsippaa arlaatigullu mingutsitsinerup kingunerisaanik taamatut atorsinnaajunnaassagaluarutsigu nunatta sinnerani taartissaanik peqanngilagut.

Taqqavaniipput inuit pikkorissorsuit, sullarinnerminnik naatitanik, savanik, nersussuarnik, siunissamilu aamma qularnanngitsumik uumasunik allarpassuarnik nunatta sinneranut pilersuisussaalerumaaginnaratik aammali pilersuisuusut.

Taamaattumik taassumaannaalluunniit pissutissaqalersippaatigut eqqarsarluarnissatsinnik aammalu uunga siunnersuummut tapersersuinissatsinnik. Taamaakkaluartorli aamma immitsinnut paarnaaruteriinnginnissarput ataatsimiititaliamit nalilersorluarneqartariaqarpoq.

Aatsitassat assigiinngitsorpassuupput, sineriassuarput tamarmi ulikkaarpoq. Ilai avinngarusimasumiipput inunnik tikinneqarpiarneq ajortumiillutik ilaali aamma inoqarfinnut ”pequusivinnullu” qanittuararsuullutik, tamarmillu minnermik annermilluunniit mingutsitsinermik kinguneqartarlutik, ajornerpaamik mingutsitsisut ilaat aatsaat ukiut 100.000 sinnerujussuarlugit qaangiuppata mingutsitsinerat affaannangortarluni, taamaattumik eqqarsarluarnissaq pisariaqarluaannarani pinngitsoorneqarsinnaanngilaq.

Unalu aatsitassanut siunnersuummut tunngammat iluatsillugu kalaaleqatigut small scale aatsitassarsiorusuttut atukkamikkut aaqqissuussiffigineqarnissaat piumasarisavarput aammalu nunaqavissunik taakkartuisarnerup ukiut marluinnaat qaangiukkaangata sakkortuserujussuarlugu aaqqittariaqarnera piumasarisallugu.

Taamatut oqaaseqarluta una siunnersuut taperserparput aappassaaneerneqannginnermilu ataatsimiititaliami sukumiisumik suliarineqarnissaa innersuussutigalugu.

Qujanaq.